



Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut katsorsarneqarnissamut tamarmik pilersarusiuunneqartarnissaat qanoq qulakkeerneqarsinnaanersoq kingusinnerpaamik ulloq 1. november 2019-mi qulaajaqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Tamatumani nunatsinni kræfteqarlutik toqusartut ikilisinneqarnissaannik anguniagaqarnerup anguneqarnissaa siunertarineqarluni.

(Inatsisartunut ilaasortat Stine Egede aamma Sofia Geisler Inuit Ataqtigiit)

(Siullermeerneqarnera)

Nappaassuarmik Kræftimik eqqugaasimalluni paasineqarnermiit sivilunerpaamik ullut 30-vit qaangiutsinnagit katsorsarneqarnerup aallartereersimasarnissaannik qularnaarussisoqartalernissaa qanoq iliorluni piviusunngortinneqarsinnaanersoq pillugu misissueqqissaarineramik ukioq 2019 naatsinnagu Naalackersuisut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jess Svane, Siumut)

(Siullermeerneqarnera)

Nappaassuaq kræfti nappaataavoq sussaangitsorsuaq kikkut tamaasa eqqorsinnaallugit. Isumaqarpunga tamarluinnatta qanigisaqartugut allanilluunniit ilisarimasaaqartugut nappaassuarmik kræftimik atugaqartunik imaluunniit atugaqarsimasunik.

Qularinngilara tamatta isumaqatigiissutigisinnaassagipput suna tamaat atorlugu pinaveersaartitsariaqartugut nappaassuarlu kræfti akiortariaqaripput. Uku siunnersuut marluk tamarmik katsorsartittarneq sammivaat, piffissarali atulaarniarpara pinaveersaartitsinermut qularutissaanngilarmi pitsaanerpaassasoq nappaassuarmik kræftimik napparsimalersartut ikilisarsinnaagutsigit. Aamma ilisimatusarnerup takutippaa, nappaassuaq kræfti pinngitsoortinniarlugu arlalinnik iliuuseqarsinnaasugut.

Siullermik pujortarunnaartariaqarpugut. Seqinup qinngornerinut illersuut tarngut atortariaqarparput. Peqqinnartunik nerisaqartariaqarpugut. Imigassamik imernikinnerusariaqarpugut aamma timigissartassaagut puallarpallaarumanata. Aamma isumagisariaqarparput meerartatta HPV-mut kapitinnissaat.

Oqippasissaqqooqaaq kisianni taasakka kræftinut assigiinngitsut pinaveersaartitsiniutaapput. Isumaqarpunga eqqartornerusariaqarigut. Kræftertartut ikilissinnaagutsigit taava aamma periarfissarissaarnerulissagaluarpugut nappaassuarmik kræftimik nappaatillit sinnerisa sukkanerumik katsorsarneqartalernissaat.



Aamma pingaarutqearpoq uannut erseqqissassallugu kinaluunniit kræfteqalersimanini pissutigalugu tarniluuteqassanngimmat. Qanorluunniit atsigisumik pinaveersaartitsigaluarutta aamma qanorluunniit immitsinnut paarilluartigigaluarutta, kræfteqalersinnaavugut. Taamaattumik pingaartorujussuuvoq qularnaassagatsigu, kikkut tamarmik nappaassuarmik kræftimik napparsimalersimasut sapinngissamik siusinnerpaamik katsorsarneqartarnissaat, taamaasiornikkut peqqissivinnissaq qaninnerusarmat.

Demokraatini paasivarput Naalakkersuisut allannguutissamik siunnersuuteqarsimasut ullumi siunnersuutitut marlunnuq suliarisatsinnut tunngasunik. Allannguutissatut siunnersuut ima oqaasertaqarpoq.

"Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut katsorsarneqarnissamut pilersaarusiunneqartarnissaanut aamma kræftimik eqqugaasimalluni paasineqarnermiit siviunerpaamik ullut 30-vit qaangiutsinnagit katsorsarneqarnerup aallartereersimasarnissaanik qularnaarisooqartalernissaanut misissueqqissaarinissamut apeqqutit qulaajarneqarnissaanut, Naalakkersuisut kingusinnerpaamik UPA2020 peqquneqarnissaannik Inatsisartut aalajangiiffigisassaattut siunnersuut."

Demokraatini allannguutissatut siunnersuut tapersorsorparput kissaatigalugulu Ilaqutariinnermut Peqqissutsimullu Ataatsimiititaliami suliarineqassasoq aappasaaneerinnginnermi.